



原來空姐是咁的



靚靚空姐話你知

小記:靚靚空姐點解成日叫話煩啊?人工咁高又可以周圍去旅行,好酸好葡萄啊!

頹廢空姐:Um……其實空姐人工真係唔太高,底薪加埋OT先得12K-13K咋,有時候加埋外站津貼先會有17K-18K嘅……

小記:吓?一個餐廳侍應都12K啦!BTW外站津貼又係乜東東?

頹廢空姐:簡單嚟講,係跟外地酒店嘅餐飲價錢再畀津貼,例如公司安排入住酒店嘅早餐價錢為10美金、午餐晚餐同為20美金,咁一日就有50美金津貼啦!

小記:人工低少少唔緊要啦!起碼可以去環遊世界㗎!小記最遠都係去台灣咋!

頹廢空姐:你誤會啦!其實呢我哋唔會喺一個地方stay好耐!東南亞一般一晚,例如2300到,0600就要走;美加歐洲都係stay兩晚。

小記:人工唔太高,工時又長都幾嗆㗎,不如同機師結婚做個幸福少奶奶啦!

頹廢空姐:其實,我哋好少可以同機師接觸,每次飛嘅地方都唔同,機師都唔同。再加上工作上都唔需要太多接觸,莫講話結婚,做朋友都難啊!

小記:咁不如你考慮吓我啦,我專一得嚟又細心!一定唔似飛機師成日放飛機。

頹廢空姐:關於空姐你仲有乜想知?

空姐最討厭

行李篇:其實空姐無責任幫乘客放行李上架!只係客人提出都可能幫手咁,但就唔好誤會係我哋份內事。

餐飲篇:食完飛機餐唔好將佢疊起,基於餐車結構,一個個盤分開先方便收拾!多謝合作!

廁所篇:媽媽千祈唔好再將BB止尿片掉入飛機上面嘅廁所,試過好多次止尿片塞住廁所,乘客又繼續著薯㗎!最後我要徒手喺充滿尿尿嘅廁所撿番止尿片出嚟!好噁心啊!

空姐哀歌

無朋友:空姐飛邊度無得自己揀㗎!無論飛邊同放假都由電腦安排,所以根本每次喺機上見到嘅空姐都係第一次見面。

提早退休:空姐一般做到55歲就要退休,比正常人早十年。退休之後有同事會留嚟公司做trainer但只佔好少數。所以好多人做六七年就轉行,大部分會再讀書進修。

剩女一族:雖然大部分空姐都人靚聲甜,但由於工作時間不穩、經常唔喺香港,所以好難同男朋友見面,即使拍拖嘅都經常會被劈腿!其實大部分空姐都係單身,而且好多剩女添。

整死人嘅時差:空姐一個月有12至14日假期,一年22日假,但放假都用作休息,因為時差令人體力透支,假期都係用嚟瞓覺。

空姐分享

頹廢空姐話工作係辛苦嘅,但入行七年成個人開朗㗎,無以前咁怕醜。每班機上所遇到嘅同事都未見過,慢慢就學識交際,亦都明白要有團隊精神先可以好好合作!所以依然熱愛呢份工作。



入行小貼士

其實空姐唔一定要好靚,反而更着重會唔會主動打招呼。即使幾緊張都要保持笑容。學歷不拘,但須操流利英語。



Mr.poop

我無追佢

Mr.栗子頭

Instagram: poop-mr

Facebook: poop.mr

MrPoop



www.facebook.com/poop.mr





B06 成報

22/7/2018 星期日



與你一起走過的日子

彌足珍貴 三本收藏版

限量發行各1000本

《成報頭條新聞精選》



\$168

《成報鑽禧娛樂大家75年》



\$198

《一起走過馬場的日子》



\$198



成報出版社有限公司
香港九龍觀塘開源道48號
威利廣場23樓